


TEZAU LITURGIC

25 MAI

SLUJBA SF. IERARH INOCHENTIE BORISOV, ARHIEPISCOPUL CHERSONULUI



MINEIUL SFINȚILOR ODESSEI
ODESSA, 2009



Мая в 25-й день Святителя Иннокентия, архиепископа Херсонскаго

На велицей вечерни

Блажен муж: 1-й антифон.

На Господи, возвах: стихиры праздника 3 и
святаго 5.

Аще кроме праздника, стихиры святаго на 8.

Глас 1:

О дивное чудо / зрим на тебе, о Иннокентие, /
всем житием Божию Матерь прославльшаго, /
Небесе и земли Царица днесь славою венчает, /
и ангельстии лица песни приносят /
песнотворцу изрядному, / и православных
собори величие возвещают проповедника
чуднаго, / и вселенная вся веселится, / память
твою совершающе, святителю богомудре.

Глас 2:

Киими похвальными словесы / пети возможем
днесь Иннокентия, / святителя и чудотворца
преславнаго, / Златоуста новаго и проповедника
изряднаго, / града и страны нашея крепкое
заступление, / людем православным скорого в
скорбех помощника, / архипастыря
досточуднаго / и молитвенника о душах наших.
Киими духовными песньми / славу днесь

возвестим дивнаго святителя, / страсти
молитвою усердною поправшаго / и
доброделания образ всем явившаго / и в память
его притекше днесь, радостно зовем: / не
забуди, отче, немощныя чада твоя, / но
молитвами твоими укрепи / вся тя любовию
призывающия / и выну прославляющия дивнаго
молитвенника о душах наших.

Киими песненными добротами / похвалити
возможем по достоянию / дивнаго во иерарсех
Иннокентия, / богословия златокованную трубу
/ и всесвятый орган Божественнаго Духа. /
Благодатию бо Божию выну озаряем, /
Православия наставник преславный явился еси
/ и проповедник показался неленостный / и
молитвенник усердный о душах наших.

Киими дивными похвалы / дерзнем память
воспети святителя Иннокентия, / но любовию
побеждаеми, усердно вси зовем: / о преславне
отче и богомудре, / образе пастырства
духовнаго и иерархов воистину похвало, / земли
Орловския плод достославный / и града Одессы
священное сокровище, / людем православным
скорый помощниче, / моли спастися душам
нашим.

Слава, глас 6:

Апостольских престолов сонаследниче / и
ангельских ликом сомолитвенниче, / пастырю

всеславный стада словеснаго и Слова Божия /
проповедниче неленостный, / Иннокентие
богомудре отче наш, / вознеси многомогущую
молитву твою / и испроси нам у Христа Господа
/ оставление грехов и велию милость.

И ныне, праздника или Богородичен, глас 6: Кто
Тебе не ублажит:

Вход. Прокимен дне.

Притчей чтение:

Память праведнаго с похвалами, и
благословение Господне на главе его. Блажен
человек, иже обрете премудрость: и смертен,
иже уведет разум. Лучше бо сию куповати,
нежели злата и сребра сокровища. Честнейшая
же есть камней многоценных: все же честное
недостойно ея есть. Долгота бо дней, и лета
живота в деснице ея: в шуйце же ея богатство и
слава. От уст ея исходит правда, закон же и
милость на языке носит. Послушайте убо мене, о
чада, честная бо реку: и блажен человек, иже
пути моя сохранит: исходи бо мои, исходи
живота, и уготовляется хотение от Господа. Сего
ради молю вас, и предлагаю мой глас сыновом
человеческим: яко аз премудрость устроих, совет
и разум и смысл аз призвах. Мой совет и
утверждение, Мой разум, Моя же крепость. Аз

Мене любящия люблю, ищущии же Мене обрящут благодать. Разумейте убо незлобивии коварство, ненаказании же прилагайте сердца. Послушайте Мене и паки, честная бо реку: и отверзу от устен правая, яко истине поучится гортань Мой, мерзски же предо Мною устны лживыя. С правдою вси глаголы уст Моих: ничтоже в них стропотно, ниже развращенно. Вся права суть разумевающим, и проста обретающим разум. Научаю бо вас истине, да будет о Господе надежда ваша, и исполнитесь Духа.

Притчей чтение:

Уста праведнаго каплют премудрость, устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот и во благих своих плод правды обымет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость. Любит Господь преподобная сердца, приятии же Ему вси, непорочнии в пути. Мудрость Господня просвещает лице разумнаго. Постигает бо желающия ю, прежде даже, разумети ю, и удобь узрится от любящих ю. Утреневавый к ней не

утрудится, и бдяй ея ради вскоре без печали будет. Яко достойных ея сама обходит, ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности мояя. И взысках невесту привести себе, яко всех Владыка возлюби ю. Таинница бо есть Божия хитрости и обретательница дел Его. Труды ея суть добродетели, целомудрию же и разуму та учит, правде и мужеству, ихже потребнее ничтоже есть в житии человеком. Аще же и многоискусства желает кто, весть древняя, и быти хотящая разсмотрит. Свесть извития словес и разрешения гаданий, знамения и чудеса проразумеет и сбытия времен и лет, и всем советник есть благ, яко бессмертие есть в ней и благославие во общении словес ея. Сего ради беседовах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим и мудростию Твоею устроивый человека, да владеет бывшими от Тебе тварьми и да управляет мир в преподобии и правде. Дажь ми Твоих престолов приседящую премудрость и не отлучи мене от отрок Твоих, яко аз раб Твой и сын рабыни Твоея. Посли ю с Небес, от святаго жилища Твоего и от Престола славы Твоея, да,

сущи со мною, научит мя, что благоугодно есть пред Тобою. И наставит мя в разум, и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение:

Праведник аще постигнет скончаться, в покои будет. Осудит же праведник, умираяй, живуция нечестивыя. Узрят бо кончину праведнаго и не разумеют, что совещаща о нем, яко повержет Господь нечестивыя безгласны ниц и поколеблет их от оснований, и до последняго исчезнут в болезни, и память их погибнет. Приидут бо в помышление согрешений своих ужасни, и обличит их сопровтив беззакония их. Тогда станет в дерзновении мнозе праведник пред лицом оскорбивших его и отметающих труды его. Видевше же его, смятутся страхом многим и ужаснутся о преславном спасении его. Рекут бо в себе, кающесе, и в тесноте духа воздохнут, и рекут: сей бе, егоже имехом некогда в посмех и в притчу поношения, безумнии. Житие его вменихом неистово и кончину его безчестну. Како вменися в сынех Божиих и во святых жребий его есть? Убо заблудихом от пути истиннаго, и правды свет не облиста нам, и солнце не возсия нам. Беззаконных

исполнихомся стезь и погибели и ходихом стези непроходны, пути же Господня не разумехом.

На литии стихирь, глас 8:

Днесь торжествуют люди православнии /
память совершающе святителя Иннокентия, / и
вселенная вся проповедует величие предивнаго
Архипастыря, / земля Орловская ныне радуется,
/ и холми Киевския песни приносят духовныя
новому чудотворцу, / страна Вологодская
веселия исполняется, / и Харьков прославляет
преславнаго проповедника, / степи херсонския
ликують, / и богоспасаемый град Одесса светло
празднует, / воспевающе Иннокентия
богомудраго.

Иннокентие отче наш, / богословия
златословесная уста и благочестия изрядное
утверждение, / кто подвиги твоя дерзнет
похвалити / или кто возможет величие твое
воспети по достоянию, / но днесь ти, припадая,
умильно вопием: / моли о граде и стране нашей
Всемилоствиваго Спаса, / святителю богомудре.

Слава, глас 4:

Житие твое непорочно бысть / и память твоя с
похвалами, / отче преславне Иннокентие, / сего
ради тя днесь прилежно молим: / во благочестии
недвижимо сердца наша утверди молитвами

твоими / и от прилогов вражиих / неврежденно
сохрани души наша, / святителю богомудре.

И ныне, праздника или Богородичен, глас
тойже:

Град почитающий Тя, и по долгу славящий, /
покрываеши, Пречистая, Твоим омофором
честным, / от нахождения противных, / от
глада же и труса, и междоусобныя брани, / Дева
Неискусобрачная Богоневеста, / человеков
Покров и Заступление.

На стиховне стихиры, глас 1:

Притецем, вернии людие, / со гласом хвалебным
прославим Троицы зеркало пресветлое, /
сладкодышущую цевницу Духа, / громогласнаго
проповедателя церковных догматов, /
Иннокентия иерархов великих равностоятеля /
и теплаго молитвенника о душах наших.

Стих: Уста моя возглаголют премудрость, / и
поучение сердца моего разум.

Приидите сладкозвучными песньми, /
восхвалим богоглаголиваго Иннокентия, /
единомудренную отцем древним маслину, /
точащую благоуханный елей Божественных
учений, / умащающаго умы и сердца наша /
благодатию Божиею.

Стих: Уста праведнаго поучатся премудрости, /
и язык его возглаголет суд.

Отче Иннокентие, / духодвижная уста твоя
мрак безверия облисташа / и заблуждшия души
уловиша: / в годину испытаний не обинуясь
извествовал еси Божественныя глаголы, / таже
ныне утверждаеши сердца наша в правоверии /
и присно молишися о душах наших.

Слава, глас 6:

Трисиянным светом Господоначала облистаемь,
/ извитийствовал еси вечныя глаголы Слова / и
любомудре упасл еси христоименитое стадо
Небеснаго Царя: / показал бо ся еси воистину
доблественное Церкви и Отечества забрало, /
добропобедный воине Христов ныне являешися
/ и вечнюеши с лики святых во обителях Отчих.

И ныне,

праздника, или Богородичен, глас тойже:

Твои раби, Владычице, / в церкви Твоей верою
предстояще, / Твоея ожидаем милости: / посети
наше смирение, / и Твоим святым Покровом /
огради люди православныя от всякаго зла.

Тропарь, глас 4:

От юных лет прилежа учению благочестия и
страху Божию, / во благодати Христовой
преуспевая, стяжал еси словесная дарования / и
явился еси неутомимый проповедниче спасения,
/ души верных озаряя спасительными смыслом /
и приводя всех ко исправлению. / Святителю

отче Иннокентие, / моли Христа Бога / дати нам оставление грехов и велию милость.

На утрени

На Бог Господь: тропарь праздника, дважды. Слава, святого. И ныне, праздника. Аще кроме праздника, тропарь святого, дважды. Слава, и ныне, Богородичен.

По 1-м стихословии седален, глас 1:
Плодами Духа украшенный, образ был пастве твоей, отче досточудне: любовью, долготерпением, верою, кротостию и воздержанием облистаеть, благий и верный управитель словеснаго наследия Божия являешия и присно молишия, во еже спастися душам нашим.

Слава, и ныне, праздника или Богородичен: Взбранной Воеводе похвалы принесл еси, отче Иннокентие, и от Нея прославления сподобился, святителю преславне, Сию же непрестанно моли о немощных чадах твоих, любовь пение Приснодеве приносящих.

По 2-м стихословии седален, глас 3:
Иннокентие отче наш, светильниче всесветлый веры православныя, прими пение недостойных

чад твоих, в похвалу ти днесь приносимья и вся заступи, пречудне, молитвою твоею.

Слава, и ныне, праздника или Богородичен: Пение дерзаем принести Ти днесь и похвалу, Дево Пренепорочная, чинов Небесных радование и земнородным воистину покрове и заступление, Ты же, Богоблагодатная Владычице, Сама благодать нам от Господа испроси, да возможем по достоянию славу Твою присно воспевати.

По полиелеи седален, глас 8:

Наста днесь светоносная память златоглаголиваго Иннокентия: / да принесем ему благоуханный елей славословий, / любоблагоутробно бо источает от нетленных мощей своих / неоскудныя милости и исцеления, / приемля сладкозвучный фимиам возношений / и моляся непрестанно о душах наших.

Слава, и ныне, праздника или Богородичен: Освящается небо и земля, / Церковь же светится, и людие вси веселятся: / се бо Мати Божия со Иннокентием достохвальным / за христианы молится Сыну и Богу Своему, / помиловати град и люди, / Богородицу непрестанно призывающия.

Степенна, 1-й антифон 4-го гласа.

Прокимен, глас 4: Честна пред Господем /
смерть преподобных Его. Стих: Что воздам
Господеви о всех, / яже воздаде ми.

Всякое дыхание: Евангелие от Иоанна, зачало
35, от полу.

По 50-м псалме стихира, глас 6:

Богоносне отче Иннокентие, / ублажаем тя
Отечества нашего неборимаго заступника / и
всеусерднаго молитвенника, / богоглаголиваго
таин Божиих провидца / и боговещаннаго
песнословца, / преподобническаго жития
нерушимаго поборника, / святителем
хриstopодражательное правило, / темже тя
просим ныне, треблаженне, / даровати
молитвами твоими нам велию милость.

Канон праздника или Богородицы на 6 и
святаго на 8

Канон святителя, глас 7, егоже краегранесие:
Иннокентию похвалу приношу.

Песнь 1

Ирмос: Сокрушившему брани мышцею своею, и
всадники тристаты погрузившему, поим Ему,
яко избавителю нашему Богу: яко прославися.
Иннокентие отче наш, от обителей славы горния
призри на чада твоя, во святем храме днесь

собравшаяся и молитвами твоими, Святителю богомудре, заступи вся, радостью ты величающия.

Недостойных устен немощное пение приими, отче богомудре, и ходатайством твоим от искушений и бед свободи вся, радостью и любовью ты величающия.

Ныне ангели на Небесех и человецы на земли светло торжествуют, и всякая тварь веселия исполняется, прославляя ты, новаго и преславного чудотворца, ты же, отче Иннокентие, не остави ны, ты днесь радостью величающих.

Богородичен: Приклонивый Небеса в Тя, Дево, вселися, и ныне на молитву Твою зрит, Богородице Чистая, Твое, Царице, исполняя прошение: Ему же за ны усердно помолися, на Тя бо надеемся, Благословенная.

Песнь 3

Ирмос: В начале небеса всесильным словом Твоим утвердиде Господи Спасе, и вседетельным и Божиим Духом, всю силу их, на недвижимем мя камени исповедания Твоего утверди.

От юности твоя явился еси сад дивный добродетелей, от корене благочестиваго процветший, Иннокентие отче наш, темже

молитвами твоими и нас настави на путь доброделания.

Кто по достоянию возможет тя похвалити, богоизбранне Иннокентие и прехвальне, от юности бо Христа Единого возлюбил еси и Того всем житием прославил еси и образ верный чадом твоим явился еси, отче, истиннаго доброделания.

Елеем молитвы исполненный и огнем любви возженный светильник явился еси, отче Иннокентие, во тме греховней сущим путь освещающий доброделания.

Богородичен: Паче солнечных луч, Твоим блистающим омофором, освещаеши Церковь и люди, и тьму грехов наших отгоняеши посещением Твоим, Богородице, к Сыну Твоему и Богу за ны молящися.

Кондак и икос праздника.

Седален, глас 6:

Иноком наставниче и ангелом сомолитвенниче,
/ земли нашея похвало и людем православным
крепкое заступление, / Иннокентие преславне
досточудне, / молитвою твоею от искушений и
бед чада твоя сохрани.

Слава, и ныне, праздника или Богородичен, глас 6
Теплая Предстательнице и непобедимая, /
упование известное и непостыдное, / стено и
покрове, и пристанище прибегающим к Тебе, /
Приснодево Чистая, / Сына Твоего и Бога моли,
/ умирение дати миру, и спасение, и велию
милость.

Песнь 4

Ирмос: Покрыла есть небеса Христе Боже,
смотрением Твоим, добродетель неизреченная
мудрости Твоя, Человеколюбче.

Непречастен соблазнам мира сего был еси,
невинности соимените, темже молитвами
твоими исцели от страстей греховных сердца
наша и сотвори ны наследники Царствия
Божия.

Тщетны быша о тебе, отче, демонския
немощныя дерзости, путем бо тесным жития
монашескаго за Христом шел еси, прехвальне
Иннокентие, и ныне во славе сияеши Царствия
Божия.

Иноческое равноангельное житие паче богатства
и славы мирския возлюбил еси, отче богомудре,
и вся красная мира сего во уметы вменивши,
воистину сын света показался еси и причастник
явился еси Царствия Божия.

Богородичен: Тебе припадаем, Госпоже, верою, и поклоняющися благодарно, вопием Ти: радуйся, Богоблагодатная Дево, покрове, и ограждение наше, и Помощнице в беде сущим, спаси нас, к Тебе прибегающих, на Тя бо надеемся.

Песнь 5

Ирмос: Ночь несветла неверным Христе, верным же просвещение в сладости словес Твоих: сего ради к Тебе утренюю, и воспеваю Твое Божество.

Юноши и старцы яко наставника своего прославляют тя, отче Иннокентие, премудрии и некнижнии ти хвалу приносят и вси тя величают, богоизбранне Святителю и земли нашея новый Златоусте.

Проповедниче Бога Слова изрядный явился еси, отче, сердца верных просвещающи спасительными смыслом, темже и нас к познанию истины настави и сердца наша светом веры просвети, Иннокентие преславне, земли нашея новый Златоусте.

Огнем словес твоих, любовью Божиею разженных, хлад греховный отгоняется и души верных согреваются, темже вси хвалу и славу ти приносят, проповедниче богомудре и земли нашея новый Златоусте.

Богородичен: Тебе вся земля дары приносит, яко Царице Божией Матери, и людие вси веселятся, покрываеми от всякаго зла Твоими, Богородице, молитвами.

Песнь 6

Ирмос: Во глубину греховную впадся Блаже, яко Иона от кита вопию Ти: возведи от тли живот мой, и спаси мя Человеколюбче.

Христова святительства иго благое на рамена своя подъял еси, отче наш Иннокентие, и воистину Пастырь добрый показался еси и отец чадолюбивый христианом православным, темже не остави ныне чада твоя духовныя.

Воистину добрый кормчий корабля церковнаго, был еси, отче досточудне, ко спасению наставляюще паству твою, темже ты ныне молим, Иннокентие преславне, не остави бурю греховною потопляемья чада твоя духовныя.

Апостолом сопрестольниче и ангелом сомолитвенниче, столпе веры недвижимый и благочестия церковнаго рачителю, отче наш Иннокентие, утиши молитвою твоею волнение многомятежных сердец наших и заступи ны, чада твоя духовныя.

Богородичен: Ангельский глас взываем Ти, Пречистая: радуйся престоле Божий, на немже Иезекииль виде Господа, Херувимы носима. С

ними же за ны, Богородице, молися, да спасет души наша.

Кондак, глас 3:

Земли нашея цвете, Церкви российския украшение, / Православия наставниче преславный, / защитниче и молитвенниче Отечества усердный, / новый русский Златоусте, / богомудре святителю Иннокентие, / моли Христа Бога / спастися душам нашим.

Икос:

Днесъ похваляему праведнику, людие веселятся, имуще таковаго богоблагодатнаго пастыря: молниегласным жезлом вещаний своих словесное стадо добротворне упасшего, таже по отшествии своем неразлучно нам пребывающа - рака бо мощей твоих, отче святыи, выну пред очима нашими видима есть. Ве мы, яко угодна бо Господеви душа твоя и много может молитва твоя, сего ради молим тя, многовещанне и богозрима Иннокентие, моли Христа Бога спастися душам нашим.

Песнь 7

Ирмос: В печь огненную ввержени преподобнии отроцы, огонь в росу преложиша, воспеванием сице вопиюще: благословен еси Господи Боже

отец наших.

Людем православным воистину утешителя и о граде Одессе молитвенника усерднаго во время лютыя брани яви тя Господь, Егоже моли от нашествия иноплеменных и всякаго обстояния нас сохранить, и миру всему мир даровати.

Усердною молитвою твоею, яже ко Пресвятей Богородице, отче, спасл еси град наш, темже и ныне и до скончания века, огради нас от всякаго злаго обстояния и умоли Владычицу мира мир безмятежен земли даровати.

Пастырь истинный овцам стада Христова явился еси в час лютыя брани и скорби, Иннокентие отче, и молитвенник усердный о Отечестве нашем, темже ныне молися Господеви миру всему мир и благоденствие даровати.

Богородичен: Творче Спасе наш, Христе Боже, приими молитву Твоя Матере, юже Тебе за ны грешныя, приносит, да Тебе, радующеся, поем: препетый отец наших Боже, благословен еси.

Песнь 8

Ирмос: Страшнаго херувимом, и чуднаго серафимом, и миру Творца, священницы и раби, и дуси праведных, пойте, благословите и превозносите его во веки.

Рака святых твоих мощей воистину источник исцелений всем, с верою приходящим, является,

отче Иннокентие, от горния бо славы твоея призираеши на смиренныя мольбы наша и скоро помощь подаеши людем, ти усердно молящимся.

Иннокентие отче достославне и чудотворче изрядный, кто возможет исчести множество чудес твоих, воистину бо помощник скорый являешися всем, тя с любовью призывающим и ти усердно молящимся.

Новаго чудотворца и скорого в бедах заступника, целителя дивнаго и молитвенника преславнаго днесь радостно прославим, Иннокентия богомудраго, помощь бо и защищение есть всем, с верою и упованием усердно молящимся.

Богородичен: Усты приносяще Тебе пение, и душею верно поклоняемся, ибо внутрь сердца наша горят. Мати Божия Пречистая, помилуй нас, верою превозносящих Тя во вся веки.

Песнь 9

Ирмос: Паче естества Матерь, и по естеству Деву, едину в женах благословенную, песнями вернии Богородицу величаем.

Отче преславне и досточудне, прими ныне пение наше и похвалы сия, от грешных устен твоей святыни приносимыя, и испроси у Господа всем, тя славящим отпущение грехов и

велию милость.

Шуия части избави, отче, любовию прославляющия тя и деснаго стояния со всеми избранными сподоби, ходатайством твоим язвы страстей исцеляющи и подающи всем велию милость.

Услыши, отче Иннокентие, пение и молитвы чад твоих и не остави ны сиры, но святыми твоими, яже к Богу мольбами от всех искушений и бед сохрани вся и испроси нам от Господа великия и богатыя милости.

Богородичен: Помяни, нас во Твоих молитвах, Госпоже Дево Богородице, да не погибнем за умножение грехов наших. Покрый нас от всякаго зла и лютых напастей: на Тя бо уповаем, Владычице Всепетая.

Светилен:

Святителю отче Иннокентие, светильниче преславный веры православныя, молитвами, святе, твоими отжени от нас мглу греховную и светом богопознания души наша просвети.

Слава, и ныне, праздника или Богородичен: Игумение Всечестная земли наша, Всесвятая Госпоже Богородице, не остави ны, Твоея помощи требующия, но спаси от бед души наша.

На хвалитех стихиры праздника 3 и святого 3.
Аще кроме праздника, стихиры святого на 4.

Стихиры святого, глас 1:

Подобен: Небесных чинов:

Небесныя чинове радовахуся, / егда душа твоя
возпари в Небесныя чертоги, / ты же, отче
Иннокентие, / купно с лики небожителей /
воспел еси Горнему Домовладыке: / Свят, Свят,
Свят еси, Господи Боже наш!

Почти Господь ты духоноснаго поборника
Своего: / в день Живоначальныя Троицы / душу
твою во обители райския пресели. / Ты же, отче
Иннокентие, / земную и небесную Церковь / во
единем славословии соединил еси, / взывая,
преходя в горняя: / Свят, Свят, Свят еси,
Господи Боже наш!

Огnezрачный серафим ревностию по Славе
Божией пламенея, / от избытка сердца твоего /
боголепно воспел еси Тричисленной Единице: /
Свят, Свят, Свят еси, Господи Боже наш!

Радуйся, святителю богомудрый, / яко восшел
еси в радость Господа твоего, / ныне молим тя:
/ призри на чада твоя с превыспренныя твоея
кафедры, / и не забуди нас, днесь в похвалу
твою собравшихся, / назирая стадо твое, /
присно песнословящих купно с тобою: / Свят,
Свят, Свят еси, Господи Боже наш!

Слава, глас 6.

Подобен: Тридневен:

Ликуй ныне, богоспасаемый граде Одессо, / яко лучами солнечными просвещаемый чудотворным Образом Касперовским; / се бо богомудрый Иннокентий / со твердыми во мучениих Анатолием и Григорием, / пречудный Гавриил храмостроитель / и дивный в чудотворениих Иона / со преподобным отцем Кукшею, / яко звезды небесныя сияючи, / присно молятся спастися граду нашему / и всем верою живущим в нем.

И ныне, праздника или Богородичен, глас тойже:

Ангельский глас вопием Ти, Дево Богоизбранная: / радуйся, Адама в рай введшая, / радуйся, христиан Надеждо и Прибежище, / радуйся, Хранительнице града нашего.

На Литургии

Прокимен, глас 7: Восхвалятся преподобнии во славе / и возрадуются на ложах своих. Стих: Воспойте Господеви песнь нову, яко дивна сотвори Господь. Апостол ко Евреем, зачало 335. Евангелие от Луки, зачало 24. Причастен: В память вечную будет праведник, от слуха зла не убоится.

[Текст воспроизводится по изданию: Службы
Одесским святым / Под общей редакцией митр.
Одесского и Измаильского Агафангела; сост.:
**архим. Тихон Василю, прот. Илия Тетерько,
прот. Андрей Николаиди.** — Одесса: Издание
Одесской духовной семинарии, Астропринт,
2009. Служба на стр. 20 – 37]

